

**Qamutit motorillit eqqunneqartarneranni akitsuutit allanngortinneqarnissaat pillugu  
Inatsisartut aalajangiiffigisassaattut siunnersuut, taamaalillutik qamutit motorillit  
ikummatissanik atuisuunngitsut akitsuuteqarunnaarsinneqarlutik**

**pillugu**

**Inatsisartut Akileraartarnermut Akitsuusiisarnermullu Ataatsimiititaliaata**

**ISUMALIUTISSIISSUTAA**

**Siunnersuutip aappassaaneernerani saqqummiunneqartoq**

Inatsisartut Akileraartarnermut Akitsuusiisarnermullu Ataatsimiititaliaa suliarinninnermini ukuninnga inuttaqarpoq:

Inatsisartunut ilaasortaq, Niels Thomsen (siulittaasoq)  
Inatsisartunut ilaasortaq, Harald Bianco (siulittaasup tullia)  
Inatsisartunut ilaasortaq, Aqqaluaq Egede  
Inatsisartunut ilaasortaq, Karl Lyberth

Siunnersuutip ulloq 13. november 2009-mi siullermeerneqarnera tunngavigalugu siunnersuut matumani pineqartoq Akileraartarnermut Akitsuusiisarnermullu Ataatsimiititaliamit misissorneqarpoq.

**Siunnersuutip imarisaa**

Nunatta ataatsimut CO<sub>2</sub>-mik aniatitsinerata annikillisinneqarnissaanut tunngavissanik pilersitsinissaq siunnersuuteqartup siunnersuuteqarnermini kissaatigaa. Tamanna ilaatigut anguneqarsinnaavoq qamutinik motorilinnik ikummatissanik atuisunik atuinerup annikillisinneratigut. Taamaattumik qamutit motorillit ikummatissanik atuisuunngitsut ukiuni sisamani misiligutaasumik eqquusermi akitsuutinut ilaatinneqannginnissaat siunnersuummi siunertarinearpoq.

**Siunnersuutip Inatsisartuni siullermeerneqarnera**

Siullermeerinermi siunnersuut partiinit tamanit taparserneqarpoq.

Biilit innaallagissamik orsussamillu (hybrid) ingerlatillit taamatuttaaq akitsuuserneqartannginnissaat isumaliutigineqartariaqartoq kissaatigineqarpoq. Biili innaallagissamik orsussamillu ingerlatilik minnerpaamik assigiinngitsunik marlunnik ingerlateqartarpoq. Assersuutigalugu biili innaallagissamik ikummatissamik motorimillu benzinamik dieselimilluunniit ingerlatilik pineqarsinnaavoq. Motorit tamarmik immikkut biili ingerlatissinnaavaat imaluunniit pisut ilaanni ataatsimoortillugit atorneqarsinnaallutik.

Aammattaaq nunatsinni aqquserngit takisuujunnginnerat assersuutigalugu biilinit innaallagiatortunut biilinit nalinginnaasunit naannerusumik ingerlasinnaasunut naleqqussinnaasut oqaatigineqarpoq. Taamaattoq nunami maani silaannaap pissusaa unammilligassaaavoq, biilimmi innaallagiamik ingerlatillit atorreqarsinnaanerisa nillernerujussuanit killerneqarsinnaanera eqqarsaatigisariaqarmat.

### **Naalakkersuisut**

Siunnersuut Naalakkersuisunit isumaqatigineqarpoq, biilinnu ikummatissanik atuisuunngitsunut ukiuni sisamani misiligutaasumik eqqussuinnermut akitsuusersuinnermik kinguneqartussaangitsumik Inatsisartut inatsisaata allanngortinneqarnissaanut siunnersuummik 2010-mi upernaakkut Inatsisartut ataatsimiinneranni saqqummiussinissaminnik Naalakkersuisut siunnersuuteqalersaarlutik.

Nunatta annersaani uuliamik tunngaveqartumik innaallagissiorqartarnera Naalakkersuisut oqaatigaat. Illoqarfinni nunaqarfinnilu taakkunani biilinit innaallagiatortunut ikaarsaartoqarneratigut innaallagissiorfinni mingutsitsineq annertuseriassaaq. Akerlianik biilit mingutsitsinerat annikilleriassalluni. Illoqarfinni nunaqarfinnilu ataasiakkaani pissutsit eqqarsaatigalugit biilnik dieselitortunik benzinatortunillu nakkutigineqartumik atuiunnaariartornissaq tulluarnepaassasoq avatangiisitigut aammalu inuiaqatigiit aningaasaqarniarneratigut pissutsit takutissinnaassagaat maannangaaq ilimagineqarsinnaavoq.

### **Akilerartarnermut Akitsuusiisarnermullu Ataatsimiititaliap siunnersuummik suliarinninnera**

Siunnersuutip Inatsisartuni Naalakkersuisunilu taparserneqarluarmat aallarniutigalugu ataatsimiititaliap maluginiarpaa.

Naalakkersuisut akissuteqaataat ataatsimiititaliap tusaatissatut tiguaa, tassungalu atatillugu allannguutissatut siunnersuutigilersaakkap suliarineqarnerani isumaliutiginninnernut biilit innaallagissamik orsussamillu ingerlatillit ilaatinneqassasut Naalakkersuisunut kaammattuutigissallugu. Biilit innaallagissamik ikummatissamillu ingerlatillit assersuutigalugu biilit innaallagissamik ingerlatillit assigalugit eqqussuinnermi akitsuuteqartinneqangivinnissaat imaluunniit biilit taamaattut ilaannakortumik ikummatissanik atuisut biilit nalinginnaasut akitsuutaannit annikinnerusumik akitsuuserneqarsinnaanersut tamatumunnga atatillugu eqqarsaatigineqarsinnaavoq.

Aammattaaq biilit nalinginnaasut biilnik innaallagiatortunik taarserneqarnerisa innaallagissamik uuliamik ikummateqartumik atuinerup kingunerisaanik avatangiisinut inuiaqatigiillu aningaasaqarnerannut sunniutigisinnaasaasa misissorneqartariaqarnerat pillugu Naalakkersuisut isumaat ataatsimiititaliamit isumaqatigineqarpoq.

### Qamutit motorillit ukiumoortumik akitsuutaat

Qamutit motorillit akileraarutaat pillugit Inatsisartut inatsisissaat nr. 3, 16. juni 1987-imeersoq, kingusinnerusukkullu allannguuteqartinneqartoq, naapertorlugu qamutitut motorilinnut akitsuummuk ukiup affakkaartumik akileeqqusisoqartarpoq. Biilip oqimaassusia tunngavigalugu

akitsuusiisoqartarpoq. Biilit immikkoortunut pingasunut agguarneqartarput; 900 kg. tikillugit oqimaassusillit, 901 kg. aamma 1.500 kg. akornanni oqimaassusillit kiisalu biilit 1.500 kg. sinnerlugit oqimaassusillit.

Immikkoortunut taakkununga ukiumut akitsuutit 5.958 kr.-iupput, 8.374 kr.-iupput kiisalu 10.950 kr.-ullutik.

Bateerit pissutaallutik biilit innaallagissamik ingerlatillit oqimaannerungaatsialertarput, taamaattumillu oqimaassuseq tunngavigalugu maanna akitsuuseeriaaseq attatiinnarneqassappat tamanna biilit benzinatortut dieselitortullu biilini innaallagissamik ingerlatilinnik taarsersornissaannut piumassuseq killiisinnaavoq. Taamaattumik allannguutissatut siunnersuutip matumani pineqartup piareersarneqarneranut atatillugu biilini pineqartunut ukiumoortumik akitsuut aamma annikillisinneqassanersoq ilanngullugu isumaliutigineqassasoq Akileraartarnermut Akitsuusiisarnermullu Ataatsimiititaliap Naalakkersuisunut kaammattuutigissavaa, aammattaarlu taamatut allannguinermi aningaasaqarnikkut kingunerisassat ilanngullugit qulaajarneqartariaqarput.

### **Akileraartarnermut Akitsuusiisarnermullu Ataatsimiititaliap inassuteqaataa**

Siuliani oqaatigineqartut aammalu siunnersuutip siullermeerneqarnerani oqaatigineqartut tunngavigalugit Akileraartarnermut Akitsuusiisarnermullu Ataatsimiititaliap **isumaqatigiittup** siunnersuut akuerineqassasoq **inassutigaa**.

Taama oqaaseqarluni Akileraartarnermut Akitsuusiisarnermullu Ataatsimiititaliap siunnersuut Inatsisartunut aappassaaniigassanngortippaa.

---

Niels Thomsen  
Siulittaasoq

---

Harald Bianco

---

Aqqaluaq Egede

---

Karl Lyberth